



## De STHB (Stadtheimatbund Münster e.V.)

is för alls dao, wat met mönsterske  
Heimatkultur to doon hät. He bütt  
siene 33 Vereine Hölpe bi Heimatpläage,  
Heimatföörskung un Präsentation van  
iähr Doon.

He möch daoto bidriägen, dat Mönster  
sienen Patt wiedergeiht äs Stadt van  
Wietenschop un Liäwensard.

He arbeidt daoför, dat Mönster in en  
Europa, wat ümmer mähr bineenwäss,  
Mönster bliff: de schöne Stadt in de  
Mitte van de hele Region, de Stadt,  
in de to liäwen sick  
lauhnt un Freide mäk.

He will methelpen, dat all dat Guede,  
wat düör 1200 Jaohre in Mönster  
wassen is un et druogen hät, siene  
Kraft behööllt.

He geiht daovan uut, dat jedereen  
in de Büörgerschop van Mönster  
sick för dat Hele tostännig föhlen  
un engageren kann un sall; dat  
bedrapp besunners de Arbeit in  
de Vereine un in en Ährenamt. So  
kann dat, wat de STH B dööt un will,  
up breiden Grund in de Stadtgesel  
schop staohn.

Uut dat graute Spektrum van  
STH B-Aktivitäten sallt hier drei  
nommt wärden:

- Mönster äs Stadt van den West-  
fäölsken Friäden van 1648 un äs  
Friädensstadt vandage wieder-  
brennen,
- de nederdüütske Kultur in Spraoke,  
Literatur, Leed, Thriaoter usw. bewah-  
ren un pläagen,
- Mönsters Büörgerschop upmüntern,  
sick för de Stadt to engageren.

# Afriet-Riemsels

Mai / Maimaond 2024

## An de Möers

Ju noog to prisene, Möers van de Wiäld,  
uut de dat Äömen stig siet Evas Naud,  
ju noog to luowen, de ji, schunnen, quiäld,  
med Kop un Hiärt doch un med Buorst un Schaut  
dat Hilge Füer düör de Tiden driägt,  
ju noog to ären, de ji söws ju giëft,  
den minsten Kiem in juë Mitte hiägt  
un düör dat Liäwen för dat Li äwen liäft,  
ji Döchter van de Graute Moder Ärd,  
ju noog to danken, dat ji glükklik maakt  
un trööstet un vergiëft un laift un läärt  
un stripelt, singt un siängt un waigt un waakt,  
dat weet wis nümsnich. Män auk dat is wis:  
dat blaots een Dag in't Jaor to weinig is.

Hannes Demming Aus: Kringe, Quinten & Korinthen, Münster 2011

## Spruch des Monats:

Kleine Kinner kleine Suorgen,  
graute Kinner graute Suorgen

Wörterklärung/Wörde:  
Äömen - Atmen; Kiem - Keim

Stadtheimatbund Münster e.V.  
Geschäftsstelle im historischen Torhaus  
Neutor 2 | 48143 Münster  
Tel.: 0251 98113978  
info@stadtheimatbund-muenster.de  
www.stadtheimatbund-muenster.de

STH B